



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 8

## Niger nungi ambassador aser sepaitem anir aotsü: Macron

## Asian Games: Shooting team-i India asoshi mezüngbuba gold medal angu



VOL. XX NO. 345 (ADOK 345) DIMAPUR SANGTENNÜ (TUESDAY)

RONGJUI (SEPTEMBER) 26, 2023

₹ 5.00

## Nagaland aser Jharkhand NCP MLA tem anema disqualification petitions benoker

**Mumbai, September 25, 2023 (Agencies):** Sharad Pawar-i aniba Nationalist Congress Party (NCP) ajanga Nagaland aser Jharkhand nung MLA tem anema disqualification petitions benokogo.

Nagaland nungi MLA 7 aser Jharkhand nungi MLA 1-i Maharashtra deputy chief minister Ajit Pawar-i aniba telok nung adenba atema disqualification petitions benok.

NCP ana akümba sülen Maharashtra nunga NCP MLA 45 anema disqualification petitions benoka liasü.

“Nagaland aser Jharkhand nung MLA tem anema disqualification petitions benokba ya party anema inyakba atema lir” ta NCP lennir Dheeraj Sharma-i ashi.

Ajit Pawar-i aniba NCP MLA tem ya Nationalist Democratic Progressive Party-BJP sorkar nung adener. Nagaland nungi

NCP MLA 7 prong Mumbai nung lir aser parnoki Mongulbarnü Ajit Pawar den ajuruteptsü akok.

Ajit Pawar-i aniba telokia Maharashtra nung Sharad Pawar-i aniba NCP MLA 10 anema disqualification petitions benokogo.

July 2, 2023 nü Ajit Pawar-i Maharashtra nung Shiv Sena-Bharatiya Janata Party sorkar nung aden aser iba sülen pa Deputy Chief Minister inyaktsü shim. Ajit Pawar-i aniba teloki pa National President inyaktsü shima liasü.

Ajit Pawar aser Sharad Pawar nati aniba telok anaprongi parnok state units 24 ajanga nungita yarir ta ashir.

Sharad-i aniba teloki party züngsetemi pusemba indang affidavits 40,000 benokogo. Külén Ajit-i aniba telokisa ibala mesükba affidavits 60,000 benoka lir.

## Myanmar nung amenoka aliba teloktemi nübo tasen shimoker: NIA

**Imphal, September 25, 2023 (Agencies):** Myanmar nung ozüngi noktanga aliba teloktemi Manipur nung security forces aser kin kar amaksü atema nübo tasen shimoker ta National Investigation Agency (NIA)-i metetdaksüogo.

Manipur nung People’s Liberation Army (PLA) züngsem ka apuba sülen NIA-i iba osang sangoktsü.

PLA ajanga training agütsüba nisung ya Moirangthem Anand Singh (45) ta jangjaogo. September 16 nü Manipur police-i nisung pungu ket nung prangpong tajung abenba aser police uniforms semer aliba atema apurtem rongnung Moirangthem dena liasü.

Manipur nung local court kati nisung pungu bail nung chiooktsü temelaba agütsü saka NIA-i M Anand Singh tanaben apu aser

Delhi-i anir ao.

Myanmar nung amenoka aliba kiralongraba teloktemi centre sorkar anema rara ayongtsüba “transnational conspiracy” ken o dak sendakba nung Anand Singh apu ta NIA-i metetdaksü.

“Myanmar nung amenoka aliba lennirtemi tasa ka atongogo. Parnoki OGWs (over ground workers), züngsemtem aser aria bilemstürtem anioker. Manipur nung security forces aser parnok anema noktakba kintem amaksü atema parnoki iba mapa inyaker” ta NIA-isa ashi.

“Iba alizüng atongtsü atema Myanmar nung amenoka aliba lennirtemi prangpong-injangtem aser tapoktsütem ozüng alema bendener. Parnoki government facilities aser resources nungia auyar” ta NIA-isa metetdaksü.



Dimapur nung aliba School of Nursing and Health Nursing School nung Ayuda Education ajanga Nursing Careers Workshop agidang tangokba noksa ka angur. Ayuda Education ajanga nursing students nem India aser bendanglen oa inyaktsü lenmangtem sayur aser iba sentong nisung 190 tema aden.

## Benjamin Yepthomi-i BJP Nagaland President inyaktsü

**Kohima, September 25, 2023 (TYO):** Nagaland BJP nung vice president Benjamin Yepthomi jenjang temaba nung ajungketer State president inyaktsü shimogo.

“BJP National President Jagat Prakash Nadda-i Nagaland, BJP State President inyaktsü atema Benjamin Yepthomi shimogo” ta BJP National general secretary & Headquarter incharge, Arjun Singh-i metetdaksü.

Benjamin ya asür Khehokhu Yepthomi’er jabaso lir. Asür Khehokhu-i Dimapur district nung yimtsüng ana- Thahekhü aser Khehokhu kümteta liasü.

Benjamin ya mapang talangka BJP züngsem ka ama lia arur aser mapa balala inyakogo.

Pai kümsük ana tashi Nagaland State BJYM President inyakba sülen November 2021 nung BJP Nagaland Vice President inyaktsü ajungketa liasü.

Minister Temjen Imna Along-i President inyaka arur kümsük tembangba sülen Benjamin-i pa melenzüker.

2018 küm tatemlen Imna Along-i Visasolie Lhoungu ket nungi State BJP president



Benjamin Yepthomi (file)

melenzüker aser January 15, 2020 nung pa ano tanaben shimshi.

2018 aser 2023 state assembly elections nung Benjamin-i BJP Election Management nung tongti shilem agia liasü. Paisa Assam, Manipur, Mizoram, Meghalaya, Bengal, Karnataka, Mumbai election nung BJP atema nüboyima senzüogo ta Nagaland BJP Media Cell-i metetdaksü.

State BJP President inyaktsü mapa lemzüksüba atema Prime Minister Narendra Modi, BJP National President JP Nadda, Union Home Minister Amit Shah aser National general secretary (organisation) B L Santhosh nung dang pelar, ta Benjamin Yepthomi-i X nung metetdaksü.

“Alima nung political party tulutiba aser nübortem maneni tenzüksüba ya maongka ka lir” ta pai ashi.

Külen, Nagaland Chief Minister Neiphiu Rio, Deputy Chief Minister Y Patton aser state president & Minister Temjen Imna Along nungertemi Benjamin nem tenüngsang agütsüogo.

CM Rio-i Benjamin aser tir menden toktsür Along naprong moatsüba osang metetdaksü.

“Benjamin Yepthomi-i party nung mapa balala inyakogo aser pa ya kanga dang meranga inyakba karyakarta ka lir” ta Deputy CM & BJP Legislature Party leader, Y. Patton-ia ashi.

“Lanur lennir ka nem party len anidaksütsü temulung lemtetba atema Prime Minister Narendra Modi aser BJP National party president JP Nadda dang pelaba metetdaksü” ta Y Patton-isa ashi.

Paisa Imna Along dang state BJP party jenjang temabai ajungketba atema pelaba metetdaksü.

“Nü alizüng aser tenanzükba ajanga BJP Nagaland temaba jenjanga anir atutsü” ta Imna Along-ia Benjamin moatsüba metetdaksüogo.

## ASU-i Grade-IV mapatem aser sorkar school tia majungba lemsatep

**Kohima, September 25, 2023 (TYO):** Kohima nung non-indigenous inhabitants pur Grade IV mapatem nung shimokba atema Angami Students’ Union (ASU)-i süoki ia bilemba metetdaksüogo.

ASU-isa sorkar rejutem nung tesayur peria maliba aser infrastructure maliba atema tebilemstü abenba shiogo.

Kohima district nung sorkar department balala nung non-indigenous inhabitants pur Grade-IV employees shimokba onük aika benokba sülen ASU-i July 4, 2023 nü Chief Secretary dangi shidi ka zülü ta tanü ASU ketdangpurtemi osangbener den senden ka amendang ashi.

“Sorkari indigenous inhabitants atema cut out year (December 1, 1963) sangoktsüba agizükba den pei pei district offices nung indigenous inhabitants pur dang Grade-IV posts nung shimoktsü ta October 26, 2017 nü sorkar sangdong agüja aliba indang Chief Secretary dangi shidi züluba nung shiogo” ta ASU-i ashi.

“Ajisüaka Kohima district nung non indigenous nung Grade-IV posts nung shimoker. Anungji sorkar orders/rules nung aliba ama mapa inyaktsü aser department aika nung lisopur temeten agiena aliba tanaben

bener arutsü atema onoki Chief Secretary dang mepishi” ta parnokisa metetdaksü.

Chief Secretary nungi telanzüba kecha mali saka onoki joko matatsü aser Kohima district nung lisopurtem Angami nung temeten atema mapa inyaktsü ta ASU-i ashi.

Kohima ya state yimtiba lir anungji Naga kin ajak meyong lir saka sorkar sangdong nung shia aliba ama maongka karbo onoki agitsü ta parnokisa shisem.

Taküm June aser July nung ASU-i educational drive ka agiogo aser idangji recognised Angami yimtsüng 83 nung sorkar school 168 aliba nungi 70% sema senzü ta ASU ketdangpurtemisa ashi.

Iba mapang free uniforms agütsüba nung tim masüba, classrooms, staff quarters, boundary fencing amala infrastructure shitak maliba aser posts den tesayurtem transfer asüba putetogo ta ASU-isa metetdaksü.

Sorkar school kar nungbo tesayur talila lir saka Angami lushi nung sorkar school tem nung tesayur 114 meperir ta parnoki ashi.

School uniforms ya mapang shitak nung aser kaketshirtem temang tasazük ama alemtsüla. Maneni class rooms aser

tesayurtem atema staff quarters shitak alitsüla ta ASU-isa shisem.

Angami lushi nung aliba sorkar school tem nung Tenyidie ka ama sayutsü mepishir ta parnokisa metetdaksü.

ASU-isa zero tolerance proxy teachers, attachment of teachers to politicians aser transfer with posts inyakym magizüker anungji School Management Committees o Village Councils dang item atema No Objective Certificates magütsütsü mepishia metetdaksüogo.

“School Education & SCERT Advisor Dr Kekhrielhoulie Yhome-i proxy tesayur ayuba atema merenshitsü aser tesayurtem kasasa alemtsü sangoktsüba atema tenüngsang agütsür aser item ya tekara nung mapa küma inyaktsü imlar” ta ASU ketdangpurtemisa ashi.

ASU-i educational tour aoba osang ya Education Department ket nung agütsütsü ta parnokisa ashi.

Iba osangbener senden nung ASU president Khriemhalie David Mere, general secretary Vimeyiekho Vitso, vice president Thejhalhoukho Khawakhrie, education secretary Asato Paphino aser secretary literature Seyielhoua Keyho nung aden.

### Nagaland nung classroom education ajungkettsü atema Teach Tool tenzüker



Nagaland Education Project-The Lighthouse kübok Teach Tool tenzüksü atema master trainers (Trainers of Teachers) training agiba noksa angur.

**Kohima, September 25, 2023 (DIPR):** Andhra Pradesh sülen India nung Teach Tool amshiba state tanabubaji Nagaland kümogo.

Teach Tool ya World Bank ajanga design asüba standardized classroom observation tool ka lir.

Iba mapa ya NEP-The Lighthouse (NECTAR) Project nung shilem ka lir aser Leadership for Equity (LFE)-i technical agency ama inyaker.

Nagaland nung Teach Tool tenzüka nung parnoki Department of School Education asr World Bank den yariteper.

September 13 nungi Mount Tabor Retreat Centre, Kohima nung Trainers of Teachers (ToTs) atema anogo 10 nü training program tenzüka agi.

Iba training ya classroom nung teacher-student

sensaksemba tajungba akümtsü atema nükjidong yur agi.

Nagaland kübok district 16 nungi observers 400-500 nem Teach Tool tesayuba agütsüsi aser parnoki tarutsü kümtem tanga tesayurtem dang sayutsü.

Teach Tool nungi angazükba ajanga Teacher Professional Development (TPD) inyakyim tajungba akümtsü.

Samagra Shiksha kübok Educational Block Resource Centres (EBRCs) den sendaktepa aliba Trainers of Teachers (ToTs) 37-i certification process nung takok ngua agiogo.

Ano, Nagaland Core Team nungi ketdangsür asem (Department of School Education (DoSE) aser SCERT nungi) den NECTAR team nungi nisung aseme takok ngua

certificate agütsüogo.

September 22, 2023 nü iba training tembangba sentong nung Commissioner and Secretary of School Education and SCERT Kevileno Angami-i training nung adener ajak nem tenüngsang agütsü.

"Nenoki Nagaland nung quality teaching aser learning practices mi apudettsü ayongzüker" ta Kevileno-isa ashi.

Sentong nung Principal Director, DoSE aser Project Director, NECTAR natia Teach Tool ajanga Nagaland ajungalen aser talisa sorkar school tem nung teaching & learning practices tajungba kümdaktsüsi ayongzüka liasü.

Anogo 10 nü Teach Tool atema master trainers (ToTs) training sentongji September 23 nü tembangogo.

### Tuensang nung Youth Festival among

**Tuensang, September 25, 2023 (DPRO):** Tuensang Town Hall nung September 25, 2023 nü Youth Festival ka mongogo. Iba sentong nung ADC Tuensang Thungchanbemo Tungoe-i tongti o jembi.

Iba sentong ya Systematic Voters Education and Electoral Participation (SVEEP) Campaign nung shilem ka ama District Administration Tuensang, District Sports Office Tuensang aser Chang Wedoshe Steshang (CWS) yaritepa ayongzüker.

"Iba Youth Festival ya asen sobaliba takar sayutsü atema lir. Kaketshirtemi pei pei

inyaksangshi aser sobaliba meteta alitsüla aser nüma atangtsüla" ta ADC Tuensang Thungchanbemo-i ashi.

Paisa arishi küm 18 ajunger kaketshirtem dang voters ama tenüng züluoktsü aser clean elections nung shilem agütsü ayongzüker.

"Asenoki bendanga agütsüba aser tashitait candidate tem shimra parnoki lokti ajungtsü atema mapa balala inyaktettsü" ta Thungchanbemo-isa ashi.

Youth Festival nung Tuensang jila nung aliba kaketshirtem aden aser photography, folk song aser Millet dish tetoktepba balala agia liasü.



GPS Map Cam  
Sotokur, Nagaland, India  
5Q38+MJP, Sotokur, Nagaland 798612, In  
Lat 26.156043°  
Long 94.764698°  
24/09/23 01:47 PM GMT +05:30

September 24 nü Sotokur SC-HWC nung Ayushman Bhava weekly Health Mela ayonga agiogo. Iba Mela ya Communicable Diseases nung ajemdaker Sotokur Community Health Officer (CHO) lenisüba kübok agiogo. Iba mapang nisung 22 dak RDT (Rapid Diagnostic Test) amshia Malaria tendang aser TB atema screenings asü. Maneni iba sentong nung tanur 17 nem Routine Immunization nung shilem ka ama vaccinations agütsü aser mashisa tetsür ana ANC (Antenatal Care) check-up asü.

### Longleng nung SVEEP kübok Football Coaching Camp agi

**Longleng, September 25, 2023 (DPRO):** Longleng nung Election Department-i Nagaland Sports Association aser Longleng District Administration den külemi Football Coaching Camp ka ayongzüka agiogo.

Iba sentong ya September 22 aser 23 anogotem Public Local Ground, Longleng nung agi aser Yingli College o Bautung Government Higher Secondary School Longleng kaketshirtem aden.

Iba sentong ya Systematic Voters' Education and Electoral

Participation (SVEEP) 2023 campaign kübok ayongzüker.

Lanurtem dang electoral process osang lemsatepba aser parnok nem shilem agidaktsüsi tayongzüka agüja iba sentong ayongzüka agiogo.

Sentong lapokdang Associate Professor & HOD (Edn) SVEEP, Nodal Officer of Yingli College Dr. Nurul Islam-i tesentepertem pelaa agizük aser PGT, SVEEP Nodal Officer of Bautung Government Higher Secondary School Imtimangyang-i anküp tepela o

jembi.

Mezüng anogo nung kaketshirtem dang basic football skills aser tactics sayua liasü. Tanabuba anogo nung kaketshirtem telok balala lemsa aser exhibition match asaya. Iba coaching camp nung kaketshir 78 aden.

Iba sentong football tesayubatem dak alia voter registration drive ka agia liasü. Sentong nung District Administration aser Election branch, Longleng staff-ia shilem agi.

### Mon DHM-i dengue atema senden amen



September 22, 2023 nü Mon DC Ajit Kumar Verma IAS lenisüba kübok District Health Mission rongdak senden amendang tangokba noksa angur.

**Mon, September 25, 2023 (DPRO):** September 22, 2023 nü Mon DC Ajit Kumar Verma IAS lenisüba kübok District Health Mission rongdak senden ka menogo.

DC Conference Hall nung amenba senden nung H&FW Department, Civil Societies aser sendaktepa alirtem aden.

"Mon nung COVID-19 wara adokba sülenbo tang mezüng atema asenok senteper aser committee züngsem ajak pelashishia agizük" ta Mon DC Ajit-i ashi.

Mon district nung temang anema alibaren dak sendakba mapa ya H&FW Department-i dang masü saka tanga

department temia inyaktüsü ta pai ashi.

Nagaland nung dengue amala tashidak adokba anema asenoki teinyaktsü shitak inyaktüsü, ta Mon DC-isa metetdaktsü.

District Health Mission senden nung Honibar shia Mon nung lokti merükmejua amongtsü lemtet.

DHM-isa district nung osang prokshitsü atema local oshitem mesüra Nagamese nung video clips tatsüsi yanglur prokshitsü lemtet.

Maneni, DHM-isa shirangertem aser anepalurtemi teka sembangba süoshi aser long pant asemtsü indang osang metetdaktsü.

September 22, 2023 nü Mon DC Ajit Kumar Verma-i Longwa nungi Konyak artisan ana nem tetushi agütsüogo.

Mon DC ya District Skill Committee nunga Chairperson lir aser pai Hongkap Konyak o Jeilei Konyak na nem tenüngsang agütsü.

"Hongkap aser Jeilei nati meranga inyakba aser bendanga agütsüba ajanga New Delhi nung Prime Minister den ajurutepa sensaksemtsü maongka angu" ta Mon DC-i ashi.

Pradhan Mantri Vishwakarma Kausal Samman Yojana tenzükdang tenati Prime Minister den ajurutep, ta paisa ashi.

### Meluri nung career guidance & legal awareness programme agi

**September 25, 2023 (DPRO):** DEF Phek-i Chakesang Students' Union aser Meluri Students' Union den yaritepa Meluri nung career

guidance & legal awareness programme ka ayonga agiogo.

Iba sentong ya September 24, 2023 nü agi aser Phek Superintendent of Police Dr. Pritipal Kaur, IPS-i career guidance aser cyber safety indang onük jembia liasü.

Iba mapang Dr. Kaur-i competitive exams indang osang lemsatepba den kaketshirtem nem study materials osang metetdaktsü.

Laisa cyber scams nungi jenbua alitsü atema nenshia jembi aser 1930 helpline mesüra NCRP portal ajanga cybercrimes osang sangoktsüsi ayongzüker.

Dr. Kaur-isa kaketshirtem

dang cyber safety osang prokshitsü atema cyber volunteers asütsü tayongzüka agütsü.

Iba sentong nung NIT Professor Md. Sayeed Khan-ia cyber world, ethical hacking aser social media tim mesüi amshiba onük jembi.

Professor Khan-i kaketshirtem dang phishing, deep fake technology amala cybercrimes nungi jenbua alitsü ayongzüker.

Paisa kaketshirtem dang mejangjaba sources nungi apps download masütsü aser public Wi-Fi o taila chargers mamshitsü ayongzüker.

Maneni, MGN Fellowship representative Sahil-ia kaketshirtem aser self-help groups (SHGs) atema sorkar schemes & programs osang tejangja lemsatep.



September 25, 2023 nü Hindon Air Force Station nung Drone Shakti 2023 exhibition sentong nung Defence Minister Rajnath Singh den MoS for Civil Aviation VK Singh aser IAF chief Air Chief Marshal V R Chaudhari nunger tangokba noksa nung angur.

# AIADMK-i BJP den tesendaktep raksar NDA teloktep toktsür

**Chennai, Rongjui/September 25 (Agencies):** Sangküm küm tetenzüklen Lok Sabha election agitsü lia AIADMK-i official sangdong ka ajanga parnoki BJP-i aniba National Democratic Alliance (NDA) teloktep toktsüba metetdaksüogo.

AIADMK aser BJP na tsüingda tesendaktep mejungi aküm.

Munusamy-i, party nung lenirtem ajaki melungtepa iba telemteba agibaji party pusemertem taginüba lir, ta ashi. Party nung inyaker crore 2 dak tema lir.

Party headquarters nung AIADMK tongti, Edappadi K Palaniswami leniba nung party bangdak lenirtem senden ka amenba mapang nung iba telemteba agia liasü. Iba senden nung adenertem rongnung office ketdangpurtem, district secretaries aser MLA/MP tem liasü.

O s a n g b e n e r t e m i asüingdangba langzüdang Munusamy-i BJP aser Tamil Nadu state unit Tir, Annamalai-i asür J. Jayalalithaa densema AIADMK lenirtem aitsüba atema mepelaba lemsatetp.

AIADMK-i BJP dang Annamalai azüoktsütsüla, ta mepishia liasü.

AIADMK lenir aser taoba mapang minister, K P Munusamy-i, party-i NDA teloktep toktsütsü aser taruba elections atema party kar den lokteptsü asoshi telemteba agiogo, ta metetdaksü.

Munusamy-i, "BJP nung inyaker temi AIADMK den teloktep aginer saka Annamalai-i AIADMK den meloktepnar. Ozü lenirtem aitsüba onoki agizüktetsü asü? Kechiba onoki nenok ajungshitsü? BJP-i yangi (Tamil Nadu) tetsüing majemoktetsü. Nenok vote bank ji meteta dang lir. Onok aliba agi dang nenok meteter," ta ashi.

AIADMK bangzüing nungji nisung shinga tenüing tetshia mali, ajisüaka Tamil Nadu nung BJP lenirtemi CN Annadurai aser taoba mapang chief minister, asür J Jayalalithaa nunger ama Dravidian nunger lenirtem tenüing menüksüba den külemi AIADMK party mapatongtem aitsür, ta shia lir.

AIADMK-i kar denbo lokteptsü asü?, ta asüingdangba langzüdang pai, "Ozü lenirtem aitsüba joko onoki magizüktetsü. Onok shinga den-a loktepa mali. BJP ji AIADMK den mali. Election mapang nung ang telemteba agitsü," ta ashi.

Talisa BJP state Tir, K Annamalai-i jembiba otem ajanga

# Khalistani-i Canada nung Indian embassies kima longkak aittsü ayonger

**New Delhi, September 25 (Agencies):** Khalistani telok kati züingsemtem dang Canada nung tongtibang yimtem nung Indian diplomatic missions kima longkak aitdang, ta ayongzükogo.

i, par organisation-i Toronto, Ottawa aser Vancouver nung Indian embassies aser consulates kima longkak aita nüburttem nem Nijjar tepsetba indang metetdaksütsü, ta ashi.

Canada senso aküm. 2020 küm July ita nung India-i Nijjar ya "kiralongrar" ta sangdonga liasü.

Tesüiba ita ishika Canada sorkari ketdangsertem den signals intelligence amshia Nijjar tepsetba bushisüingdanga arudar.

Tawa Canada Ato kilonser Justin Trudeau-i, British Columbia nung Khalistani lenir Hardeep Singh Nijjar tepsetba nung India-i shilem agia alitsüa akok, ta jembiba sülen India aser Canada na tsüingda tesendaktep mejungi kümogo.

"Onoki Canada dang Indian ambassador jendoktsü akhanger," ta Grewal-isa ashi.

Bendanglen Sikh nunger nütsüing teimba aliba linükji Canada lir. Tang Canada nung Sikh nunger 770,000 shi lir. Canada nung mapang shia Sikh nungertemi longkak aitba ajanga India kanga jashidaktsür.

Toronto Police Department-i, ongak aittsü sentong alibaji onoki meteta lir, ibayongji security atema renemshidar, ta metetdaksü.

India nung nütsüing shilem 2 dang Sikh nunger lir, ajisüaka nungbo nütsüing teimtibaji Sikh nunger lir. Küm 500 tejaklen Sikh yimsü ya tenzüka liasü.

Nijjar ya taküm June 18 nü gurudwara kima lia nisung anati khaseta liasü.

Sikhs for Justice (SFJ) lenir, Gurpatwant Singh Pannun-ibo Canada nung aliba Hindu nungertemi Canada toktsür aotsüla, ta shia amokmerenogo.

Osangbener den jembidang Sikh for Justice in Canada Director, Jatinder Singh Grewal-

Küm 25 shi tejaklen Nijjar-i Punjab toktsür aoba sülen



September 25, 2023 nü Chennai nung AIADMK Party headquarters nung party Tir, Edappadi K Palaniswami-i osangbenertem den jembidang tangokba noksa nung angur.

# India nung anojungi teyira akümer tanur million 4.3 lir

**New Delhi, September 25 (Agencies):** India nung arrshi küm 5 ser tekübok tanur million 4.3 dak temabo anojungi temang touzük tali küma timtemer, ta sorkari metetdaksü.

Interest (NAPi)-i India nung kanga sapua achiba aser taseptsü nung seper ayokba chiyungtsü tapu 43 asadanga liasü.

Item chiyungtsüji temang atema kanga tajung ama advertise asür, saka chiyungtsü teimbaka temang atema ajungba scientific kuli mali, ta report nung shia lir.

Indian Council of Medical Research (ICMR)-i, India nung nisung pezü shia nungi kabo diabetes mesüra tali yiraba agi timtemer, ta metetdaksü.

Item chiyungtsü rongnung cake, pastries, chips, biscuit, noodles aser soft drinks densema lir. Item chiyungtsü ya tanurtem dak rangloker nungtugu nisungtemi ajungkettsür aser advertise asür, ta kasa osang ajanga metetdaksü.

Iba dak alia item chiyungtsü aika nung shini, metsü mesüra temo tali keta aliba taseptsü nung zülüja mali. Parnoki talisa chips, biscuits aser brown bread nung item ya tendanga liasü.

India nung chiyungtsü balala taseptsü nung seper ayokba survey ka agiba ajanga temang nung teyari magütsüba chiyungtsü balala taseptsü nung seper ayokba maziüktetba jangjaogo.

Nutrition Advocacy for Public Interest (NAPi) coordinator, Dr. Arun Gupta-i, item chiyungtsü karbo Food Safety & Standards Act of 2006 (FSS Act) aser Consumer Protection Act of 2019 ozüngtem alema lir, ta metetdaksü.

Nutrition Advocacy for Public Interest (NAPi) coordinator, Dr. Arun Gupta-i, item chiyungtsü karbo Food Safety & Standards Act of 2006 (FSS Act) aser Consumer Protection Act of 2019 ozüngtem alema lir, ta metetdaksü.

Nutrition Advocacy for Public

September 25, 2023 nü Bhopal nung BJP pur 'Karyakarta Mahakumbh' sentong nung Ato kilonser Narendra Modi den Union Minister Jyotiraditya Scindia, Madhya Pradesh Chief Minister Shivraj Singh Chouhan aser State BJP Tir VD Sharma nunger angur.



**FORM NO.14**  
[See Regulation 33(2)]

**OFFICE OF THE RECOVERY OFFICER - III**  
**DEBTS RECOVERY TRIBUNAL GUWAHATI**  
Suwana Bhawan, House No.12, New Town Path, Near Hanuman Mandir,  
G.S. Road, Ulubari, Guwahati-781007 (Assam)

**DEMAND NOTICE**  
**NOTICE UNDER SECTIONS 25 TO 28 OF THE RECOVERY OF DEBTS & BANKRUPTCY ACT, 1993 AND RULE 2 OF SECOND SCHEDULE TO THE INCOME TAX ACT, 1961.**

**RC/153/2022**  
STATE BANK OF INDIA  
-Versus-  
**LOZI HYUNDAI**

**To,**  
**(CD1)** Lozi Hyundai Registered Office Sanuoru, New Secretariat Road Kohima, Nagaland, Kohima-785001.  
**(CD2)** SRI ALHOU KESIEZIE Proprietor of Lozi Hyundai Son of Late Keduosievi Kesiezie Resident of L Khel Kohima, Village Kohima - 797001, Nagaland. Presiding Officer, DEBTS RECOVERY TRIBUNAL, GUWAHATI-i **OA/219/2021** nung ajemdaker tetuyuba agütsüba Recovery Certificate kubok sen **10892408.25 (Rupees One Crore Eight Lakh Ninety Two Thousands Four Hundred Eight And Paise Twenty Five Only)** den pendentelette aser **01.10.2021** anogo nungi sen tetemlok @ 8.50 % den costs sen **111255/- (Rupees One Lakh Eleven Thousands Two Hundred Fifty Five Only)** na anema sentsüh lir (Jointly and severally/ Fully/ Limited) ta metetdaksür.

1. Recovery Certificate nung sentsühji yamai lir:	Rs. 1,08,92,408.25
2. 01.10.2021 nungi 19.12.2022 tashi nung tetemlok @ Rs.8.50%	Rs. 11,84,996.63
3. Costs	Rs. 1,11,255.00
<b>TOTAL</b>	<b>Rs. 1,21,88,659.88</b>

2. Iba notice agütsüba anogo nungi tenzüka anogo 15 tsüingda temalen shia aliba senji agüjang ta nü dang tuyur, senji magütsüteltra Recovery of Debts Due to Banks & Financial Institutions Act, 1993 aser Rules kubok senji alangzüksü atema inyaksü.

3. Nü dang taruba ken o mangadanga affidavit nung nü meyong kiojen aser osetsüset sangdongtsü tuyur.

4. Maneni ken o angadangtsü atema nü dang tsüinglanglen sign süa lir matsüingdangi na **01.05.2023** anogo nung anepdang 10:30 ako nung arutsü tuyur.

5. Temalen shia aliba dak alia nai item sen-a agütsüsüsa akümsü:  
(a) Iba notice certificate/execution proceedings nungi tenzüka sen tetemlok agütsüsü.  
(b) Iba notice agütsüba aser warrant aser sentsüh angütsü atema inyaksangshiba ajak nung teindokba sen, charges aser expenses agütsüsü.  
Iba anogo: **01.09.2023** nung kü meyongnem aser Tribunal seal agütsür.

**RECOVERY OFFICER**  
**Debts Recovery Tribunal**  
**Guwahati.**



## TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI (SEPTEMBER) 26, 2023

### Dimapur tzümetsüng

- P Tiamongba Aier

**T**aküm tzüngluruwa tenzükba sülen Dimapur nung alirtemi tzümetsüng timtem aiben ajurua aruogo. Talisa tan September ita tzünglu kanga aruba ajanga Dimapur kübok tesem aika tzü agi metsüngbanga timtemba sülen September 19, 2023 nü District Planning and Development Board (DPDB) Dimapur senden nung Dimapur nungi MLA ana- Moatoshi Longkumer aser Hekhani Jakhalu na den ketdangsürtemi iba tebilemtsü benoka lemsatepogo. DPDB senden nung Revenue Officer Dimapur-i drainage systems indang field report lemsatepdang tesem 29 nung temulung agütsütsü shia liasü. RO Dimapur-isa tesem 29 nungi 13 nung kiojen yanglua aliba ajanga timtem ajurur anungji agientsüla ta ashi. Iba sülen Honibar aser Deobar anogotem Urban Development and Municipal Affairs Advisor Zhaleo Rio-i Dimapur nung drainage systems ajunga ama repranga senzüba sülen teinyaktsü kar metetdaksüogo. Ajisüaka, Dimapur nung tzümetsüng timtem ya tang tasen atalokerba masü saka küm aika nübortemi iba khuret ajangshia arur. Tzümetsüng timtem ajuru shia MLA tem mesüra district ketdangsürtemi drainage systems tajungba kümdaktsütsü nangzüker saka mapabo balaka meinyaki lia taruba küm-a nübortemi kasa timtem ajangshiyonga arur. Nagaland nung Dimapur jila kümteter joko küm aika süia arur aser tzümetsüng, traffic amala tebilemtsütem ajurudang taoba mapang Town Planning Office nung inyakertemi kechi kodaser yamai ajurutsüsa inyakteta yutsü ta tasüngdangba arur. Tanübo iba nüngja melenshir Urban Development Office ta ajar saka maparenbo kasa dang. 1966 küm Nagaland Town and Country Planning Act lateta lir saka kechiba küm paika arudang Dimapur town planner temi drainage system nung temulung magütsü aser kodaser drainage ali atsünga agidaktsütsüsa alir? Dimapur tiyongtsü nung Dhansiri ayong lir anungji tzümetsüng timtem yabo majurutsüsa drainage system yanglutsü lenmang sadema dang lir sernung kechiba Urban Development Office nung inyakertemi iba atema asameyanga mapa meinyaker? Talisa Dimapur nung Naga Council Dimapur (NCD) tuluba ser loktiliba aser nübortem atema tentetba telok aika lir. Ano kiyong, yimtsüng sasep nunga council balala tenteta lir saka public tebilemtsütem asoshi bangdakpurtem rongshia lemtet tajung agia mapa inyaketa moutetba ajiteter. Dimapur nung kümshia nütsüng teimba renloktsü, kiojen teimba yanglutsü, gari teimba akümstsü anungji Dimapur district nungi MLA tem den ano Urban Development and Municipal Affairs Advisor-i temulung agütsüba mapang loktitentetem aser public lennirtemia terbang ia Urban Development Office den külemi Dimapur nung tzümetsüng, traffic timtem ajema kümdaktsütsü asoshi sentong tajung yanglua mapa inyaktsü ayongzüker. Dimapur nung drainage system ya junga yanglura tarutsünungbo Dengue ama merla ajanga adokba tashidaktem ya samaa aotsü ana nung dang lir.

## OLEMSABANG

### Tsüngremi Sarasadem Nüktzü Akanger

- Rev. Dr. Mar Pongener,  
Executive Secretary, ABAM

(Yashi adok nungi...)

Tsüngremi asen Ao kin moatsür masü no? Mezünpur süa 'Khrista Yimsü' Aor nem amuoktsü masü no? Iba yimsü yagibo temeim sayutsü, tatok agütsütsü, kati ka taoba ta züngshitsü, telemsa makai libalirotsü, tila küma ajemalutsü, ngasangatema asüküma malitsü indang sayur masü no? Tesasatsüka tanübo asen tashi maitba ajanga Yisu Yimsüi sayuba ama melitetsüsa akümba ya khuret tulu masü na? Saka ya angatetdi, "Kibuba temeim yimlibilem tulu agi asenok mesamai lir. Kechiaser pa taochi kodanga tatem maka." (Aia 3:22). Tsüngrem taochi aser temeim agi asen taküm lidaktsür sürnung teyanglur Tsüngrem pelatsüsa aseni melitetsü no? Tsüngrem dak mulung alemtsü melena alima rongsen, tashi aser asen temetetba dak mulung lemer yamai liteptsü no? Idaki Tsüngrem mulung chidima? Kor talungtsü dak temulung lemer alir nisungtemji metsükdaktsü aser alangtsü saka Tsüngrem dak temulung lema Pa tashi nung nokdakertembo memetsükdaktsü aser malangtsü (TKe 20:7,8). Alima nüburtem peladaktsütsü merandang Tsüngrem mepelatsüsa inyakadokra aser jembiadokra asenok asoshi tesasatsü ulura asütsü masu na? Arung, Tsüngremer tejembiba ola angashitsü asoshi asen tashi maitbatem toktsür tamang nung akanga lidi.

Tsüngrem oi kechi ashir ta masü saka whatsapp nung kechi shia lir? Koba amala message ka lir? Shibai kechi shia lir? Shibai koma langzüa lir? ta asübatem tongtipangba kümdaktsüba jenjang ka nung asenok tamangertem liteper. Aseni inyakba mapa ngua Tsüngrem pelar asü masü ta bilemdangtsü melena ni züluba message nung kari 'thumbs up' agütsüra alima ajak kokteter ama joktena pelaba tangatetba nung liteper. Alima ainba den jangyu medema asen meküta tatalokbatem meteta, khuret balala asoshi temerük shisatsü aser tangatetba agi sapang balala ajanga kati ka yariteptsüji tongtipang. Saka Tsüngrem oi kechi ashir ta asüba züdoka toktsüra asenok asoshi aiatai. Laishiba zünga sarasademtsü atemabo mapang peria mali saka mobile amshitsübo mapang peria kar ta litetra idakji tebilemtsü lir ta metetdi. Item ajak angateta inyaktetsü Tsüngremi tangatetba agüjang ta mepia nüktzü yimdi.

Tsüngremi asenok meimba yong yimya balala ajanga jilia pai asen den jembir. Tetsübuttsü lendong balala, tasüba wara aser tashidak balala agi menepba aruba, mangyim ola agi kibongtem asüngtsü, miim mozü tashi ajanga senti taküm aika anojungi arishi tembangtsü, nisung rongnung temeim mokonga akümstsü, tetsükchitep aser tarshitep sübotsü bushir tali renloktsü aser tamangertem tamang jenjang alima tashi aser temetetba nem kokdaktsütsü, item indang asen nem angatetdaksür. Atapisüa melii Tsüngrem taochi bushidi arung. Tebilemtsü khuret balalai meketbanger alidang Tsüngrem nungi tesünep, temeim, teyari aser leniba meshia mepidi. Khuret balala agi asen mekütbangdang Tsüngremi asenok memeimba agi ta masü saka item mapangtem ya asenok asoshi Tsüngrem tali bushitsü mapang ta metetdi. Aseni Tsüngrem yimli aser Pa temeshiba bushira asen asoshi temoatsü peria rizüngja lir ta angateta maneni nüktzü yima sarasademdi. "Kecha nunga temulung tatem ma, saka ajak nung sarasademba aser mepishiba aser tenüngsang agi nenoki mepishiba Tsüngrem nem metetdakang." (Fil 4:6). "Kü sarasadem angang, Oh Kibuba, ni ayimtenba nung tenarong tenang; kü nüktzü ngur nai ola madoki teli... (TKe 39:12). Ya asen sarasadem tamang südi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir**

## Impur nung Sunday School Tesayur Triennial conference agi



**Impur, Rongjui/September 25 (TYO):** ABAM Literature & Education Ministry Secretary, Dr. Moanungsang Tzudir lenisüba nung Sunday School Triennial Conference September 22-24 anogotem nung "Tekümtet Otsü nung Masadangtetba Tsüngrem Temeim" (I Yohan 4:19) omen nung ajemdaker Impur nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Iba sentong ya shilem asem lemsar- Tekülem sentong, Tangazükyim aser O toktepba sentong agi.

Conference omen nung ajemdaker onük pezü lemsar

tekülem sentong agia liasü. Onüktem yamai liasü, Tekümtet Otsü nung Lenir ka, Khristan Tesayuba, Tamang Tenangzükba aser Tenyaba mapa.

Tekülem sentong nung O Jembirtem Rev. Dr. Mar Pongener, Executive Secretary, ABAM, Dr. Moanungsang Tzudir, Secretary Literature & Education, ABAM, Mrs. Alice Walling, APCE, KABA aser Dr. Awala Temshi, Administrator, Straightway Christian Mission Centre, Mkg liasü.

Tangazükyim sentong nung onüktem; Tekümtet otsü nung Yisu mesüka aniba, Inyadkanga angazükba, Purapitet aser Sobaliba Yimya.

Iba angazükyim nung

shisalen sayurtemji Toshi Sanglir, Secretary, ABAM YM, Kilang Lkr Pastor Nukmen BA, Imnatoshi Lkr Asso. Pastor, DABA aser Robert Lkr, Founder & Director, Christian Centre for Visual and Performing Arts nunger liasü.

O toktepba mapang "Arogoi Tekümtet Otsü Temapa Jenjang nung Yutsür" onük nung O toktepa temoatsü ngua liasü.

Ajak agi Arogo 117 nungi delegates 749 arua aden.

ABAM Education & Literature kübok tesayurtem ajanga talisa tarutsü nükla yutetba lanurtem dang tekümtet otsü sayudang Tsüngremi Pa metetba lanur aika adokdakjang ta sarasademer.

## Azerbaijan-i Armenia nunger Khristantem samatsütsü: Nash-Marshall



Siobhan Nash-Marshall

**September 25, 2023:** Nagorno-Karabakh region nung aliba Armenia nunger Khristan 120,000 samatsütsüa akok, ta US nung meimchir temeden atema inyaker, Siobhan Nash-Marshall-i metetdaksü.

Osangbener den jembidang Nash-Marshall-i, "Tawa amakbatem aser raraba hadir ayuba ajanga Artsakh (Nagorno-Karabakh taka ajar) nung nüburtem samatsü," ta ashi.

Nagorno-Karabakh region nung Armenia nunger Khristantem yaritsü atema 2011 küm Nash-Marshall-i Christians in Need Foundation (CINF) tenteta liasü aser 2020 küm lai Nagorno-Karabakh nung tanurtem aser taintem naprong atema schools lapoktsü.

Nash-Marshall-i, Azerbaijan sorkari maneni

Nagorno-Karabakh region azüoktsü meranger, anungji yangji aliba lisopur Armenia Khristantem tashiyim amshia meindoktsü, ta ashi.

"Artsakh nung alirtem karibo pei tetsü-tasoli metoktsütsü, kechiyong parnok akhidang nungi iba tesem nungji alir. Anungji tashiyim amshia dang parnok meindoktsü mesüra tamajungba ataloktsü," ta Nash-Marshall-i ashi.

"Iba region toktsür aotsü telemtetba agir Armenia nungertem teti atema tarak aketsü aser ibaji nisung jenti tepsetba nungi jenburtem ama asütsü," ta lai ashi.

Nagorno-Karabakh region ya Azerbaijan shilem ka ta aikati agizüker, ajisüaka iba region nung lisopur Armenia Khristantem Republic of Artsakh kübok parnoki nüchiso nguogo, ta ashir.

September 19 nü Azerbaijan sepaitemi sashia amakba sülen taoba Bodhbarnü Nagorno-Karabakh nung aliba Khristantem raraba hadir ayutsü melunga liasü.

Azerbaijan sepaitemi rocket aser mortars amshia amakdang anogo ka kija nung Armenia nunger Khristan 200 dak tema tepset aser aika yirua liasü.

Artsakh Ministry of Foreign Affairs-i ashiba agi, sepaitem jagisa tetsür-tanur densema Armenia nunger nisung 10,000 shi kidang nungi meindoka liasü.

Taoba mapang Artsakh state nung minister, Ruben Vardenyan-i United Nations Security Council (UNSC) dang Nagorno-Karabakh nung Khristantem kümzüksü atema inyadkaksüner, ta mepishiogo. Azerbaijan-i Lachin Corridor mokdangba ajanga Nagorno-Karabakh nung Khristantem chiyungtsü aser mozü densema nungdak balala agi anünga kanga timtemdar.

Tesüiba küm aika Armenia aser Azerbaijan tsüngda Nagorno-Karabakh region atema rarar.

Yaküm December ita nungi Nagorno-Karabakh aser Armenia na sendaktepba lenmang Lachin Corridor mokdanga lir.

2020 küm November ita nungi tensa mejungi aruba sülen Mongolbarnü Azerbaijan-i missile aser mortars amshia Artsakh amak.

## ANOGO ABEN TSÜNGREM DEN

### Süngyanglu jenjang

T. Ken 135:13-21

Laishiba nung mapa kar kanga tongtipang Tsüngremi lephsia amshiba angur. T.ken 135 tatembanglen tekongtem aser T.ken 115 nung tangar kintem süngyanglu tasü süngyanglu ta ashiba angur. "Kintem süngyanglutemji nisung teka agi yangluba mapa hon aser taribi lir. Parnok tebang lir, saka parnoki mejembir; parnok tenük lir, saka parnoki mangur; parnok tenarong lir, saka parnoki mangashir; mesüra parnok tebang nung tangula kecha mali. Nisung shia shibai parnok dak temulung lemdir, shirnoki parnok yanglu parnok mesüka akümtsü" (t. 15-18). Yangi asenoki tamachi külembaji nisung teka mapa lir. Saka tanü ibaji inyaker. Aikati parnok teka mapa külemer.

Nai külemdar ta nai koda metet? Nai inyakba mapa, tenla aser kechi alir aji ne Tsüngrem. Kari sen külemer. Kar asoshi rongsentem. Ano kari nükjitong mesüra nübur. Iba tamashi ken züluri asenok dang ashir. Süngyanglutem tebang lir, saka parnoki tenangzükba meyanglur. Saka asen Tsüngremi asenok den jembir, aser Pai pa o nung tenangzükbatem agütsür. Süngyanglutem tenük kar, saka parnoki angutsü makok. Parnoki mawabangteter.

Tsüngrem tenüki asenok anogo shia mapang ajak nung mita alir. Pa kodanga memejanger. "Kibuba tenük Temeshi pur madak teti alir" (T.ken 34:14). Pai pa chirtem anebalur. Süngyanglutem tenarong kar, saka parnoki ne sarasademtem mangashir. Nai süngyanglu ka den jembira, nai ne sasa den jembir. Saka Tsüngrem tenarong aseni ayimtenba tsütsü lapoka lir. Pai ashir, " Kü dang jaang, aser ni ne dang langzütsü" (Yr.33:3).

Süngyanglu külemba nung tejashitibaji asenoki külemba Tsüngrem mesüka asenok akümer. " Nisung shia shibai parnok dak temulung lemdir, shirnoki parnok yanglu parnok mesüka akümtsü(t.18). Saka asenoki ochi aser taküm aliba Tsüngrem külemra, asenok Pa mesük akümtsü. Asenok Yisu Khrista mesükba nung melenshitsü.

Nai kechi külemer kümdangang.Satani Kibuba temelen aika agütsür. Pa jakdang tang tsüngremtem teyu; Pa dang külemang. Kibuba külemba nokdangba süngyanglutem indokang.

## 2070 küm tashi nung US nung Khristan shilem 50 den tajemba asütsü

**New Delhi, September 25** 2070 küm tashi nungbo (Agencies): 1990s mapang America nunger Khristantem nung tenzüka America nunger nung Khristan yimsü tokja Tsüngrem dak mamangertem mesüra Tsüngrem lir ta report ka ajanga metetdaksü.

Tang amai dang ora tang nungi tenzüka taruba küm 50 tashi nung America nung yimsü dak sendakba tensa koma asütsü?, ta nisung aikati shisadanger.

Washington D.C nung amenoka aliba Pew Research Center-i ashiba agi, 2020 küm tanurtem densema America nunger nütsüng shilem 64 bo Khristantem liasü, tamangba yimsü ka danga mamanger nütsüng shilem 30 liasü aser tanüngba nütsüng shilem 6 ji Yihuda nunger, Muslim, Hindu aser Buddhist yimsü amangertem liasü.

Pew Research ajangasa, America nunger Khristantem nütsüng shilem 54 nungi shilem 35 tashi dang akümtsüa akok, ta metetdaksü. 2070 küm tashi nungji America nunger Tsüngrem dak mamangertem nütsüngji shilem 34 nungi shilem 52 tashi akümtsüa akok, ta kasa report ajanga metetdaksü. 2020 küm sülen nungi US nung shingaia yimsü memelen aser memelentsüa akok. Putu shia nung arrshi küm 30 majungdang Khristan shilem 31 bo yimsü kecha nunga affiliate masür aser affiliate süa malir shilem 21 Khristan akümer, ta Pew report ajanga metetdaksü. Putu tasenba nung putu shia Khristan aikati arrshi küm 30 majungdang yimsü toktsür aser kecha yimsü mamanger shilem 21 Khristan akümer, ta parnokisa metetdaksü.

OLONG PAITEP # 6648

Grid for Olong Paitep # 6648 with numbers 1-15 in various positions.

TIPILEN and LANGTSÜNGLEN lists for Olong Paitep # 6648.

OLONG PAITEP # 6647 TELANGZÜBA

TIPILEN and LANGTSÜNGLEN lists for Olong Paitep # 6647.

TSÜNGREM O SATAN NA KATITEPER : Tsüngrem : Hai Satan, nai yashi aibelena Engineer ka nür yimli-i, tetezü molumi-i aniketato, meyipa yokang! Satan : Masateni liang, pa atubayongang onok A/C raksar aliba yangluogo, fridge aser TV yanglushiogo, ano asepana mapa aika anüngdaka lirji teyokla mahanooo! Tsüngrem : Na aji ozüng nung aibelener akoti, ni court nung case agütsütsü ako. Satan : Hehehe, okatsür, obendanger ajunga kü den lir nung na shibai jembitsütsüba, hü! ~ Lilir : WhatsApp

Tepela Tasoba Anogo. Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jellia e-mail : tiriyim@gmail.com nung yokang mesüra Tir Yimyim bureau tem nung agüjang. 1. Tenüng : ..... 2. Tasoba anogo: ..... 3. Küm : ..... 4. Class : ..... 5. School : ..... 6. Talidak : ..... 7. Salem osang : .....

Mizoram nung Manipur nungi arua aliba IDPs nem chiyongtsü & mozü dang agütsütsü

Aizawl, Rongjui/Sept. 25 (Agencies): Azüdokshi agi kongshir aliba Manipur nungi tang Mizoram nung jenoka aliba internally displaced people (IDP) nem central sorkari senotsü teyari magütsütsü. Iba melen central sorkari Manipur nungi Mizoram nung aliba IDPs nem chiyongtsü aser mozü ang agütsütsü. Iba osang ya Ministry of Home Affairs ajanga Mizoram home department dang metetdaksü. Iba osang ya Centre-i tebang

agi sangoktsüba lir ta Mizoram home commissioner H Lalengmawia-i ashi. "Home ministry ajanga onok dang tebang agi ashi aser teyari atema tezüluba nung agüja mali," ta Mizoram home commissioner H Lalengmawia-i ashi. "Ministry nem onoki agütsüba nung rice, pulses, potato, edible oil, onion, mozü, medical oset aser danga nüngdakbatem ita trok asoshi meshi," ta pai ashi. Mizoram Chief Minister

Zoramthanga-i May 23 nü Union Home Minister Amit Shah dangi shiti ka züluba asoshi MHA ajanga iba telangzüba ya agütsüba lir. Union Home Minister Amit Shah dangi shiti ka züluba nung CM Zoramthanga-i Manipur nungi arua Mizoram indang district 11 nung jenoka aliba IDPs nem teyari agütsütsü asoshi sen crore 10 meshia liasü. September 23 tashinung Mizoram nung Manipur nungi aruba nisung 11,973 lir.

Manipur nung timtem agütsütsü atema Myanmar nung telungpuri nübu shimer: NIA

Imphal, Rongjui/Sept. 25 (Agencies): Azüdokshi agi kanga mejungi kongshir aliba Manipur nung security forces aser ethnic groups züngsemtem dak amaktsü asoshi Myanmar nung nokdang aliba telok balalai nübu shimer, ta National Investigation Agency (NIA) ajanga ashi. Manipur nung nokdanga aliba People's Liberation Army (PLA) telok nungi "trained operative" ka apuba sülen NIA nungi iba osang ya sangdonger. Nok-nü tesashi bena aliba aser police uniform sema aliba mechi Manipur police temi September 16 nü nisung pongu apur rongnung densema alisang "trained operative" ya arishi küm 45 tain Moirangthem Anand Singh ta jangaogo. Nisung pongu nemya court gai bail agüjaka NIA ajanga M Anand Singh ya tanaben apu aser Delhi-i bener ao. Manipur nung kin balala tsüngta mepetmesü adokdakja central sorkar den rara mesütsü mechi Myanmar nung amenoka aliba kiralongrar telok temi tasa tamajung yangluba ken o dak sendakba nung Singh ya apu, ta NIA ajanga ashi. "Myanmar nung aliba

lenirtemi tasa yangluba nung ajemdaker nokdanga aliba kiralongrar telok temi OGWs (over ground workers), cadres aser temeimertem anidena Manipur nung aliba security forces aser mangatetep adoka aliba kintem dak lendong agüja iba tensa ya par ajangzüka nung amshitsü merangba tang tashi bushisüngdanga nung temai adoka lir," ta NIA ajanga ashi. "Aser iba atema Myanmar nung aliba lenirtemi ozüng alema nok-nü, injang aser tapoktsü osettem bendener aser aiben sorkar meyong hadir ayuba tesema amaker," ta ashi. India-Myanmar international border koba Manipur nung kilometre 70 lir, iba ya atsübangtsü asoshi Manipur nung jembishinü tenzüko. India aser Myanmar arütsü ano kilometre 70 shi atsübangtsü atema Manipur Chief Minister N Biren Singh-i Deobarnü nungi tenzüka jembishinü akar. Manipur chief minister-i Border Roads Organisation (BRO) ketdangsurtem den senden ka mena Indo-Myanmar arütsü nung ano arütsü kilometre 70 atsübangtsü atema jembia liasü.

"Kidanger linük (Myanmar) nungi ozüng alema immigration aruba aser temesepba mozü shibelenba tali akumba mechi asen arütsü kumzüka alitsü ya kanga tongtipang aser tangsa inyakla mapa kumogo," ta Manipur CM-i ashi. Indo-Myanmar arütsü nung kilometre 60 atsü atsütsü atema BRO nem central sorkari work order agütsüogo, ta CM Biren Singh-i taoba mapang shia liasü. "Asenok asoshi mezüng inyaktsübaji Myanmar nungi ozüng alema nisung aitba anendaktsütsüba ya lir. Iba atema asenoki tekeraba nung arütsü atsübangtsü nüngdak," ta pai ashi. India aser Myanmar tsüngta Free Movement Regime (FMR) teti asoshi shibangtsü state sorkari Centre dang asüngdangogo, ta Biren Singh-i sangdonger anogo ka dang lir arütsü nung atsü atsütsüba indang jembishinü ya ali. 2018 küm India aser Myanmar tsüngta zülutepba Free Movement Regime (FMR) agreement yagi international border nung alirtem anatsüleni kilometre 16 tashi tenokdanga makai senzütsü melar.

Meghalaya state BJP tir atema Rikman Momin shimogo

Shillong, Rongjui/Sept. 25 (Agencies): Hombarnü Centre nung aliba BJP ajanga Meghalaya nung iba party tir inyaktsü asoshi Rikman Momin shimogo. Momin ya national council member aser Garo Hills nungi yimten yimsüsür nübu tejen ka lir. Pai Ernest Mawrie melentsü. Kasa anogo BJP central lenir temi Nagaland BJP tir Temjen Imna Along melena Benjamin Yepthomi shima liasü. Iba totuyuba ya aoksa arur aser Yepthomi dang tangnungi tenzüka iba menden agizüktsü ashi. BJP Nagaland State Unit tir Temjen Imna Along-i taoba mapang Twitter ta ajaba social media sapang X nung Benjamin Yepthomi nem tenüngsang agüja liasü. BJP National President JP

Nadda-i totuyuba ka agütsüba nung, Benjamin Yepthomi ya Nagaland BJP indang state president tasenba ama inyaktsü 'central leadership' ajanga shimer, ta shia liasü. Benjamin Yepthomi ya Nagaland state BJP vice president inyakago aser ano taoba mapang BJYM Nagaland state president inyaka liasü. Pa state nung BJYM tir ama kümsük ana tashi inyaka liasü. Minister Temjen Imna Along ya Nagaland BJP tir ka ama January 15, 2020 nungi

inyaka aru. Pa ya Nagaland Legislative Assembly nung züngsem ka lir aser Chief Minister Neiphiu Rio indang cabinet nung minister lir.



Rikman Momin

# 50<sup>th</sup> Wedding Anniversary

"Temeimi tamajung nung mepelar, saka ochi den pelateper, temeimi ajak imlar aser ajak aremzüker."  
1 Korint 13:6-7



Mrs. & Rev. I. Sowa  
26.09.1973 - 26.09.2023

Temeim Oja & Oba (Otsü & Obou)

Tsüngremi na asoshi teyarir tembar tajung moatsüogo. Iba 50<sup>th</sup> Wedding Anniversary anogo tongtetba ajanga Tsüngremi nena mulungjangi aginüba ajak agüjang aser nena sentong ajak atalokdakjang.

Happy 50<sup>th</sup> Wedding Anniversary

From : Chirnurtem, In-laws aser Semchirtem.

## Mulungnen O



TASOBA  
20-06-1938

TASÜBA  
18-09-2023

Late. OBANGMAR AO

Asür Mr. Obangmar Ao, Rtd. DSP (Chuchuyimlang) shiranga aliba mapang nungi tasüba anogo tashi adianu, tembar, kiyonger, arogo, lokti tentet balala aser kija kibong shirnokisa ozü mangyim aser tejashi melong züreb tia nung alidang temeim aser aria bilem agi nübu, rongsen, shisatsü aser tamang sarasadem agi yariogo nenok ajak dang kangasa pelara ta lemsateper.

Nenok temeim aser mapa tajung asoshi ozüü kodanga mamatsü. Nenok ajak dangi tsüngdong aruagi pelara ta meshiteter, saka asen takarsang temoatsüba Tsüngremi nenok ajak nem alia moajang ta ozü sarasadem.

~ Temeim Kinungtsü, Chirnur aser Kinungertem.

## Imran Khan ya high-security Adiala prison-i anir aotsü

Islamabad, Rongjui/Sept. 25 (Agencies): Hombarnü Pakistan court kati ketdangsürtem dang Punjab province kübok Attock jail nung yua aliba taoba ato kilonser Imran Khan ya Rawalpindi yimti nung aliba high-security Adiala prison-i belentsü totuyuba agütsüogo, ta osangtem ajanga ashir.

August ita Pakistan Tehreek-e-Insaf (PTI) ajanga Islamabad High Court dang par party tekolakba ya Adiala prison-i belentsü petition agüja liasü, kong A-class facilities lir aser Khan ya kibong tajung nungi aser loktiliba aser yimtenren nunga jenjang tajung nung liasü.

Iba ken o jembidang Islamabad High Court Chief Justice Aamer Farooq-i "PTI chairman ya Adiala jail-i belenang," ta ashi. Iba ken o nung obendang agütsüba ya tezüluba nungbo ano magütsü.

"Islamabad High Court Chief Justice-i PTI chairman Imran Khan ya Attock Prison nungi Rawalpindi nung aliba Adiala Prison-i belentsü totuyuba agütsüogo," ta Khan'er party

ajanga ashi.

Iba ken o ya Islamabad High Court Chief Justice Aamer Farooq lenisüba nung jembia liasü aser Khan okatsür Sher Afzal Marwat aser Additional Attorney General Munawar Iqbal Dogal nungera court nung nokdak.

Islamabad High Court kima osangbener den jembidang, Attock jail nungi Adiala jail-i Khan belentsü asoshi Islamabad High Court nungi temelaba agütsüogo, ta Marwat-i ashi.

Toshakhana ochimashi ken o nung aitsüba sülen arishi küm 70 tain Khan ya August 5 nungi Attock Jail nung yua lir. Iba temerenshi ya IHC ajanga August 29 nü songtemtsü, saka cipher (secret diplomatic cable) temai adokba ken o mechi Attock jail nungsa lir.

Official Secrets Act kübok amenokba special court ajanga September 13 nü cipher ken o nung Khan ya September 26 tashi par kübok ayutsü anogo atsülanga liasü.

Security mechi Khan anema cipher ken o ya Attock jail nung special court ajanga jembir.

Küm asem Khan tepuokdak ayutsü obendang agütsüba Islamabad trial court ajanga ketdangsür dang pa Adiala prison nung ayutsü totuyuba agüja liasü. Ajisüaka pa apuba sülen Attock jail nung dang ayu.

Ken o jembidang Justic Farooq-i PTI chairman temerenshi melenshiogo, ta ashi. Islamabad nung aliba under-trail prisoner ajak Adiala jail nung yua lir.

"Kechiba PTI chairman tang tashi Attock jail nung yua lir? Kechiba Adiala jail nung masü?" ta pai asüngdang.

Toshakhana ken o atema totuyuba agütsüba nung Imran ya Adiala jail nung ayutsü shia aliba IHC Chief Justice-i bilemtet.

Iba mapang, "Cipher ken o nung PTI chairman apudang court-i pa Attock jail nung ayutsü shia liasü," ta Dogal-i langzü.

Aser iba mapang Khan okatsür Marwat-i court dang taoba ato kilonser ya saisaponger ka liasü asünung pa nem exercise machine agütsütsü mepishi, ta osang ajanga ashi.

## Launching of Longkhüm Tourism Website Sponsored by: Late Dr. I. Longrizüng Trust

Date : 27/09/2023

Time : 10:00 AM

Venue : Tourist lodge, Longkhüm

- Guest of Honour : Smti. Imtisenla Pongener, Senior Tourism Officer, Mokochung
- Compere : Mr. Tsungtaloba Imchen
- Invocation : Dr. Zülü Sor. Pastor, NCRC, Longkhüm
- Welcome Address : Mr. C. Angang, Chairman, Longkhüm Village Council
- Introductory Note : Mr. L. Alemtemsu Ao, Dr. I. Longrizüng Trust
- Tourism Website : Er. Atoba. A. Longkumer
- Launching of Website :
- Speech : Smti. Imtisenla Pongener, Sr. Tourism Officer, Mkg
- Appreciation Note : Mr. Rongpang Longchar, Longkhüm Tourism Committee
- Benediction : Mr. Toshimongba, Youth Pastor, LBC

## Niger nungi ambassador aser sepaitem anir aotsü: Macron

Paris, Rongjui/Sept. 25 (Agencies): Democracy yimya nung shimba Niger Tir Mohamed Bazoum mitkar temi tashiyim amshia July ita atsüngdokba sülen iba linük nungi ambassador aser sepaitem anir aotsü, ta France Tir Emmanuel Macron-i ashi.

"France-i ambassador anir arutsü telemtetba agiogo. Ghonda ishika tsüngta asen ambassador aser diplomats kar France-i meyipa shilangtsü," ta Macron-i Deobarnü television sensaksem ka nung ashi.

Mitkar tsütsü tesendaktep tembangogo aser iba linük nung France sepaite 1,500 aliba ya hopta aser ita ishika tsüngta anir arutsü aser sepaite ajak küm tatem tashinung anir arumatsü, ta pai ashi.

Mitkar temi ajungshiba aser nüburtemi longkak aitba sülen iba linük nungi France ainshitsü telemtetba ya agi. France sepaitem aliba tesem ka tezülen densema Niger yimtiba Niamey nung tawa nisung meyirijang aika adenshia longkak aita liasü.

July 26 nü mitkar tashi

amshia sorkar atsüngdokba Macron-i agizüktsü memolungba sülen Niger nung yimsüsür tasentemi par linük nungi France ketdangsürtem ainshitsü khanga arur aser France tiri sangdongba parnoki pelashishia agizük.

"Niger tashi temeden tsütsü mera tasen ka asoshi tan Deobarnü asenok benjonger. Ibai otsüsütsü mapang ka lir, koba ajanga Niger nüburtem temolungtetba aser tejangraba indang jembir," ta parnoki national television nung

sangdong ka zünga ashi.

France sepaitem ya parnoki taoba mapang amokbanga aliba Mali aser Burkina Faso linüktem nungia ainshitsü asüngdang lia iba telemtetba ya agir.

"Ibai Niger nung ketdangsür asoshi takok tilaka lir aser France asoshi maksü ka amai lir. France ambassador ya embassy telung nung yua lir. Niger security forces temi shinga maitdaksür mesüra madokdaksür. Anungji pa embassy telung nung ration chiyongtsü chia alir," ta

osangbener kati ashi.

July ita mitkar temi sorkar atsüngdokba mechi iba region nung aliba Economic Community of West African States (ECOWAS) ajanga tenokdangba balala agütsü aser Bazoum nem tanaben tir menden agütsütsü merangba nung tamakok ngura mitkar temi teka sangshitsü ta tekum dangtsü shia lir. Ajisüaka mitkar temi yimsü asüba linüktem kati ka bhukumba mechi ECOWAS jembishinü tajemba kumogo.

(Maneni tapak 8 nung...)

## Nagaland ketdangsürtemi India Sepaktakraw team den ajurutep



Nagaland nungui ketdantsürtem aser tanga lenirtem Indira Gandhi Indoor Stadium, New Delhi nung India tetsür aser tebur Sepaktakraw team tem den tangokba noksa nung angur.

**Dimapur, Rongjui/September 25 (TYO):** Director Kethosituo Sekhose aser Joint Resident Commissioner Wennyei Konyak nati anir September 25 nü Department of Youth Resources & Sports nungi ketdangsürtemi Indira Gandhi Indoor Stadium, New Delhi nung sensaksem sentong ka agiogo.

Senden nung India tebur aser tetsür Sepaktakraw team temi shilem agi, shirnok Indian Asian Games Contingent nung shilem ka ama tang camp nung lir.

Sentong nung Nagaland

nungi ketdangsürtemi Sepaktakraw asaya nung tongtibang nisungtem nem tetushi agütsü. Tetushi agütsürtem rongnung Asian Sepaktakraw Federation Deputy tir Yogender Singh Dahiya, Chief Coach Hemraj Dhira, tebur team coach A B Sharma, tetsür team coach Mamta, physiotherapist tem aser India tenung nung asayatsü aliba Sepaktakraw asayartem densema lir.

Asian Games nung India tenung nung asayatsü atema shimba atema Director Kethosituo Sekhose-i

asayartem nem tenüngsang agütsü aser takok ngua asayatsü imla ataba lemsatep. Maneni MLA aser Advisor to Youth Resources & Sports, S. Keoshu Yimkhiung nungi shiti ka Chief Minister Neiphiu Rio aser Nagaland nung aliba nüburttem tenung nung agüja liasü.

Temetetsü kaji tetsür Sepaktakraw Team nung Nagaland nungi Sezovelu Dozo aser Seyiekhrieno Tapa nata densema lir. Dozo ya India Sepaktakraw contingent nung asayartem rongnung tanutsütüla lir.

## NSF Trophy: Khuzama YO & F4C nati pei tata asaya kokogo

**Kohima, Rongjui/September 25 (TYO):** Angami Students' Union (ASU)-i ayongzüka tang Indira Gandhi Stadium Kohima nung asaya aliba 23buba NSF Martyrs' Memorial Trophy nung Hombarnü Khuzama Youth Organisation aser Football For Change (F4C) Academy nati pei tata asaya koka round of 16-i iogo.

Mezüngbuba asaya nung Khuzama YO-i goal ana agi Sepfü Football Club madak takok ngua liasü.

Asaya mezüngbuba shilem nungbo team kati goal midaktsüteti liasü, ajisüaka asaya tanabuba shilem nung

minute 61buba nung Zevito Khizo-i (7) Khuzama YO atema mezüngbuba goal idaktsü aser iba sülen minute 75buba nung Vilhuvoto Sale-i (12) par team asoshi tanabuba goal idaktsü.

Iba asaya atema Khizo nem man of the match naroküm agütsü, koba taoba ASU aser NSF tir Kelhouniezo Andrew Yhome-i agüja liasü.

Hombarnü tanabuba asaya F4C Academy-i goal 4-0 agi Kigwema Students Union ayong ayonga kokogo.

Asaya nung Lungin Lhouvum-i (9) minute tekububa nung par team asoshi mezüngbuba goal idaktsü aser

iba sülen minute 59buba nung Kishore Tiwari-i (7) tanabuba goal idakja liasü. Iba sülen minute 77buba nung KSU nungi asayar kati own goal ka idaktsü aser minute 80buba nung Kamgouha-i (11) goal pezübuba idakja liasü.

Iba asaya atema taoba tir aser tang ASU Tribunal Voto Neikha-i, F4C Academy nungi asayar Ngamminlem Khonsai (13) nem man of the match naroküm agüja liasü.

### September 26 nü asaya:

1. Meriema Youth Organisation vs Jakhama Youth Organisation @11:30AM
2. Tiema Khe Kidima vs Chedema Warriors @ 1:30PM.

## Niger nungi ambassador aser...

(Tapak 7 nungi...)

Sahel nung linük asem - Niger, Mali aser Burkina Faso - nung küm ishika tsüngta mitkar temi tashiyim amshia sorkar atsüngdoka lir aser linük asem yagi September 16 nü defence tsütsü telungjem tezüngzüktep ka agiogo.

Tensa tamajungba akumba ajanga pai Bazoum dang France-i ambassador meyipa anir arutsü telemteba agiogo aser ghonda ishika tsüngta ozü ambassador aser diplomats aika France-i meyipa shilangtsü ta Deobarnü shiogo, ta Macron-i ashi.

Bazoum ya "hostage" ama yua lir aser linük nung ozüng agi melaba lenirji pa sa lir ta France tangatetba Macron-i nenshia ashi.

"Pai tasü ita temelenshi mapa

inyakba ajanga mitkar lenirtemi pa dak tenük yok, kechiaser yangji yimtenre tsütsü tasümaait lir," ta pai ashi.

Niger nung France mitkartem aliba ya par sorkari mepishiba ama yokba lir, ta Macron-i ashi.

Linük antiolen telungpur temi sorkar anema nokdakba nungi linük kumzüka ayutsü asoshi Bazoum indang sorkari mapa shidak meinyaker ta jembia sorkar atsüngdoka sülen Niger mitkar yimsüsür temi France den mitkar tsütsü tesendaktep rakdang.

Central Mali, northern Burkina Faso aser western Niger tashi Sahel region ya tiyong sür tesüiba küm ter

tsüngta al-Qaeda aser ISIL (ISIS) den sendaktepa aliba telungpur telok balalai azüdokshia arur.

Antiolen linüktemi Bazoum den lungjemer telungpur azüoktsü merang aser Niger sepai tashi itshitsü mechi mitkar nem sen dollar million aika jenjang teyari agüja arua liasü.

Kasa mapang France aser par tembar linüktem mesüzüktsü mechi alima ajunga nungi lenirtem adenshiba UN senden nung West African linüktem ajunga shilem magidaktsüsa United Nations Secretary-General Antonio Guterres-i tetsükdaktsü agütsür, ta mitkar sorkari Hokulbarnü tai tonglojka liasü.

## Asian Games: Shooting team-i India asoshi mezüngbuba gold medal angu

**Rongjui/September 25, 2023 (Agencies):** Hongzhou (China) nung tang asaya aliba Asian Games nung Hombarnü 10m Air Rifle event nung tebur team-i India asoshi mezüngbuba gold medal nguogo.

Panwar Singh, Rudrankash Balasaheb aser Aishwary Pratap Singh Tomar nung aser point 1893.7 nguteta gold medal angu aser iba den world record tasen ka yanglua liasü.

Rudranksh-i point 632.5, Tomar-i 631.6 aser Panwar-i 629.6 ngua otsü tasen ka yanglua liasü.

Iba asaya nung South Korea nung asayar Sangdo Kim, Taeyun Nam aser Hajun Park nung aser silver aser China nung asayar Linshu Du, Lihao Sheng aser Haonan Yu nung aser bronze medal ngua liasü.

Kasa asayamung nungsa India nung aser rower temi ano bronze medal ana nguogo. Jaswinder Singh, Bheem Singh, Punit Kumar aser Ashish Goliyan nung aser Hombarnü teburtem fours event nung bronze medal ngua liasü.

Tebur quadruple sculls team event nunga Satnam Singh, Parminder Singh, Jakar Khan aser Sukhmeet Singh nung aser 6:08.61 seconds nung alizüng tongteta silver medal angu. Iba

asaya nung China-i (6:02.65) gold aser Uzbekistan-i (6:04.64) silver medal ngua liasü.

India nung asayartem ya pezübuba nung liasü saka 2000-metre race nung tatembangbuba 500-metre nung parnoki tasembuba nung aliba telok ajateta liasü.

India nung aser rower temi tang tashi nung silver ana aser bronze medal pezü ngua lir.

Hombarnüsa 25m rapid-fire team nung Adarsh Singh, Anish Bhanwala aser Vijayveer Sidhu nung aser point 1718 ngua Indonesia den kasasa nung tembangba sülen aggregate nung takok ngua bronze medal nguogo.

Iba asaya nung China team-i (1765) gold aser South Korea team-i (1734) silver medal ngua liasü.

Maneni Aishwary Pratap Singh Tomar-i tebur 10m Air Rifle event nung bronze medal ka nguogo.

Külem India nung asayar Rudranksh Patil den tasembuba jenjang asoshi toktepa sülen Aishwary-i bronze medal ngua liasü.

Tomar aser Rudranksh napronglai qualification round nungbo kanga junga asaya ajisüaka tesasatsüka gold mesüra silver medal mongutet.

## Dimapur Open Championship asayaogo



**Dimapur, Rongjui/September 25 (TYO):** Dimapur District Table Tennis Association-i ayongzüka September 22 aser 23 nü Dimapur Multi-Purpose Stadium, Dimapur nung DIMAPUR OPEN Table Tennis Championship asayaogo.

Iba asayamung nung TT asayar 70 dak temai shilem agia liasü.

Tetoktepa nung category balala lemsar asayaogo aser iba ajanga asayartem pei tata jenjang nung tokteptsü asoshi maongka agütsüogo.

Asayamung nung takok angurtem yamai alitsü:

### Men's Single:

1. Hito Shohe
2. G Hekito Sema

### Men's Double :

1. G Hekito Sema & Visasier Kevichusa

2. Hito Shohe & Anuj Kumar Jain  
**Veteran:**

1. Visasier Kevichusa
2. Meihomlung Rongmei

### Women's Single:

1. Elita A Sangtam
2. Tania Kachari

### Women's Double :

1. Tania Kachari & Elita A Sangtam
2. Vinika Awomi & Ningsangrenla

### Sub- Junior boys:

1. David Hinglak
2. Akumlong Longkumer

Dimapur District Open Championship nungi top 4 asayartem Dimapur district Table Tennis Association tenung nung "26buba Inter-District & State Table Tennis Championship, 2023" nung asayatsü koba Mokokchung nung October 23 nungi 26 tashi asayatsü renema lir.

## BILEMDANGANG

"Nai kechi mazüokteter aji toktsütsü angazükang."